

2 KORINT

JEPTA 1

- [2Ko 1.1] Paul ri jelōkan Kūraij Jijej kōn ankilaan Anij, im Timote jated, ñan eklejia eo an Anij, eo ej pād i Korint, kab ro remman otemjej, ro rej i aolepen Akeia:
- [2] Jouj ñan kom kab aenōmman jān Anij Jemed im Irooj Jijej Kūraij.
- [3] Jen nōbar Anij eo Jeman ad Irooj Jijej Kūraij, Jeman tūriamokake, im Anij in aenōmman otemjej;
- [4] Eo ej kaenōmmane kōm ilo am jorrāān otemjej, bwe kōmwīn maroñ in kaenōmmane ro rej pād ilo jabdewōt jorrāān, kōn aenōmman eo kōmij make aenōmman kake jān Anij.
- [5] Bwe āinwōt eñtaan ko an Kūraij rej lōñlōk ñan kōm, āindein am aenōmman ej bar lōñlōk kōn Kūraij.
- [6] Bwe eļaññe kōm jorrāān, ej ñan ami aenōmman im mour; ak eļaññe kōm aenōmman, men in ñan ami aenōmman, eo ej jermal ilo kijenmej iumwīn eñtaan kein kōmij barāinwōt eñtaan kaki: im am kōjatdikdik kōn kom e pen wōt;
- [7] Ke kōm jeļā bwe āinwōt komij bōk mōttan eñtaan ko, āindein barāinwōt aenōmman.
- [8] Bwe kōm jab kōṇaan, ro jatiō, bwe komwīn jaje kōn am jorrāān eo ej itok ñan kōm i Esia, bwe e ar kanooj ļap am eñtaan, eļap jān am maroñe, āinwōt bwe ejako kōtmāne otemjej kōn mour:
- [9] Aet, kōm ar make ļōmṇak kōm dien mej, bwe kōmin jab make lōke kōm, a Anij eo Ej kajerkakpeje ro remej:
- [10] □Eo e ar ļomṇoren kōm jān keien mej eļap, im E naaj ļomṇor: kōn E kōm kōjatdikdik kōm bwe E naaj barāinwōt ļomṇoren kōm;
- [11] Ke komij barāinwōt jimor jipañ kōm kōn ami jar, bwe, kōn men in yokwe emōj letok ñan kōm kōn elōñ armej, elōñ re naaj kamṇoolol kōn kōm.
- [12] Bwe am lañlōñ men in, kōnnaan in am bōklōkōt, bwe ilo kwōjarjar im ṇool an Anij, jab ilo mālōtlōt in kanniōk, a ilo jouj an Anij, kōm ar etetal i laļ, im elōñlōk ippemi.
- [13] Bwe kōm jab jejewōj men ko jet, a men ko komij kōnono ilo bok ak kwaļok, im ij kōtmāne kom naaj kwaļoki ñan jemļokōn:
- [14] Āinwōt kom ar bar kwaļok kōm ilo jimattan, bwe kōm ami men in kōmmejāje, āinwōt kom barāinwōt am, ilo raan in ad Irooj Jijej.
- [15] Im ilo lōke in I ar pepe in iwōj mōkta ñan kom, bwe komwīn bōk bar juon men in jouj,
- [16] Im bwe in ilok jān kom ļok ñan Masedonia, im bar itok jān Masedonia ñan kom, im bwe komwīn jipañlōk eō ilo ial eo aō ñan Judia.
- [17] Ke āindein aō pepe, I ar kōjak ke? ak men ko ij pepe, ij pepe ekkar ñan kanniōk ke, bwe ippa en ewor aet, aet, im jab, jab?
- [18] A āinwōt Anij etiljek, am naan wōj e jab aet im jab.

- [19] Bwe Nejin Anij, Jijej Kūraij, eo kōm ar kwaļok ñan kom, aet, ña im Silvenōs im Timote, e ar jab aet im jab, a ilo E aet.
- [20] Bwe ñe jabdewōt oran kallimur an Anij, ilo E aet eo: kōn men in barāinwōt kōn E Amen eo, ñan aiboojoj an Anij kōn kōm.
- [21] Kiiō Eo ej kapen kōm kab kom ilo Kūraij, im E ar kapit kōj, E Anij;
- [22] Eo e ar sil kōj im letok Jetōb eo men in mōkajkaj ilo būrued.
- [23] A ij kūr ñan Anij bwe En kōnnaan kōn aō, bwe kōn aō tūriaṃokake kom I jab kar iwōj ñan Korint.
- [24] Jab bwe kōm irooj ioon ami tōmak, a kōm ri jipañ ilo ami lañlōñ: bwe kōn tōmak komij jutak.

JEPTA 2

- [2Ko 2.1] A I ar pepe eñin ippa, bwe in jab bar iwōj ñan kom ilo būromōj.
- [2] Bwe eļañne ij kabūromōj kom, innām wōn eo ej kalañlōñ eō, a eo wōt ij kabūromōj e?
- [3] Im I ar jeje eñin, bwe ñe ij iwōj, in jab bōk būromōj jān ro emṃan in mōṃṃō kake er; ke ij lōke kom otemjej bwe aō mōṃṃō eo ami otemjej.
- [4] Bwe jān elōñ jorrāan im eñtaan būruō I ar jeje wōj ñan kom kōn elōñ dānnin kōmjaala; jab bwe koṃwin būromōj, a bwe koṃwin jeļā yokwe eo ippa e kanooj lap ñan kom.
- [5] A eļañne jabdewōt e ar kabūromōj, e ar jab kabūromōj eō, a ilo jimattan (bwe in jab kinaakļok eļap) kom otemjej.
- [6] E bwe ñan armej in liaakļok eo elōñ raar kōmmane;
- [7] Innām āinjuon emṃan bwe koṃwin joļok an nana im kaenōmṃan e, ñe ab juon āinwōt en jo ilo an būromōj eļapļok.
- [8] Kōn men in ij akweļap ñan kom bwe koṃwin kapen ami yokwe e.
- [9] Bwe ñan men in I ar barāinwōt jejewōj, bwe in jeļā kajjiemi, eļañne komij kipiliie ilo men otemjej.
- [10] A jabdewōt eo kōmij joļok an nana, bar āinwōt ña: bwe eļañne I ar joļok jabdewōt nana, I ar joļok nana eo kōn kom, āinwōt imaan mejan Kūraij;
- [11] Bwe Setan en jab joñe kōj: bwe je jab jaje kake madmōd ko an.
- [12] A ke I ar itok ñan Troas bwe in kwaļok gospel an Kūraij, im juon aor epeļok ñan eō ilo Irooj,
- [13] I ar jab aenōmṃan ilo aō, bwe I ar jab lo Taitōs jatiō: a I ar iokyokwe er, im ilok jān ippaer ñan Masedonia.
- [14] A kaṃmoolol Anij, eo Ej tōl kōm ilo anjo iien otemjej ilo Kūraij, im Ej kaalikkar kōn kōm ñaj in An jeļā ijo ko otemjej.
- [15] Bwe kōm men in ñaj emṃan an Kūraij ñan Anij, ippān ro rej mour, im ippān ro rej jako;
- [16] Ñan rein kōm men in ñaj jān mej ñan mej; a ñan raan men in ñaj jān mour ñan mour. Im wōn ej maroñe men kein?

[17] Bwe kōm jab āinwōt elōñ, ro rej kãreik naan in Anij; a āinwōt jãn mool, a āinwōt jãn Anij, iṃaan mejan Anij, kōmij kōnono ilo Kūraij.

JEPTA 3

- [2Ko 3.1] Kōmij jino bar kwaḷok kaddadim ñan kom ke? ak emṃan ke en wor lōta in kaddadim ñan kom, ak jãn kom, āinwōt jet armej?
- [2] Kom lōta eo am, jeje ilo būruem, im emōj an armej otemjej jeḷã im kōnono ilo lōta iṃ;
- [3] Ke e alikkar bwe kom lōta an Kūraij, eo kōm ar jerbale, jab jeje kōn inik, a kōn Jetōb òn Anij emour; jab ilo tebōḷ dekā, a ilo būruemi tebōḷ kanniōk ko.
- [4] A lōke āindein ippem kōn Kūraij ñan Anij:
- [5] Jab bwe kōm make maroñ in lõmṃak jabdewōt āinwōt jãn kōm make; a am maroñe e jãn Anij;
- [6] Eo e ar bar kamaroñ kōm ri jermal in kallimur ekããl; jab ilo lōta, a ilo jetōb: bwe lōta ej kajeekḷok, a jetōb ej kemour.
- [7] A eḷaññe jermal in mej, eo ilo lōta, im bukwe ilo dekā ko, e ar waḷok ilo aiboojoj, āinwōt bwe ro nejin Israel raar jab maroñ in kallimjek mejan Moses kōn an aiboojoj turin mejan; eo e jedkaju:
- [8] Ekōjkan, jermal in Jetōb en jab ḷapḷok ilo aiboojoj ke?
- [9] Bwe eḷaññe ewor aiboojoj ippãn jermal in liaakḷok, eḷapḷok an jermal in kwōjarjar e obrak kōn aiboojoj.
- [10] □Bwe emool eñeo, ar kaiboojoj e, ar jab kaiboojoj e ilo men iṃ, kōn aiboojoj eo eḷapḷok.
- [11] Bwe eḷaññe men eo ejedkaju e ar aiboojoj, eḷapḷok men eo ej pãd wōt ej ilo aiboojoj.
- [12] Ke āindein am kōtmãne kōmij peran in kōnono,
- [13] Im jab āinwōt an Moses likūt veil iṃaan mejan, bwe ro nejin Israel ren jab kallimjeke ñan jemḷokōn men eo e jedkaju:
- [14] A būrueir raar pen: bwe ñan raan iṃ ej pãd wōt veil eo ilo kōnono ilo kallimur eo mōkta, eo e ḷotḷok ilo Kūraij.
- [15] A ñan raan iṃ, jabdewōt iien rej kōnono jeje an Moses, veil ej pãd ion būrueir.
- [16] Ijokwe ñe ej oktak ñan Irooj, veil eo ej jako.
- [17] Kiiō Irooj e Jetōb eo; im ijo Jetōb òn Irooj ej pãd, ijo anemkwōj.
- [18] A kōj otemjej, ejjeḷok veil iṃaan mejed, jej kallimjek, āinwōt ilo kapjer, aiboojoj an Irooj, im jej kōjakkōlkōl ñan wãween eo jãn aiboojoj ñan aiboojoj, āinwōt kōn Irooj, Jetōb.

JEPTA 4

- [2Ko 4.1] Innãm ke jermal iṃ ippem, āinwōt kōm ar bōk tūriamō, kōm jab ebbeer:
- [2] A kōm ar ilok jãn men ko rettino men in kajook, im jab etetal ilo ṃon, im jab kariab naan in Anij; a kōn kaalikkar mool, kōm kwaḷok kaddadim ñan bōklōkōt an armej otemjej iṃaan mejan Anij.

- [3] A eļāñņe e penjak am gospel, e penjak ñan ro re jako;
- [4] Ilo er anij in laļ in e ar kapilo ļōmņak an ro re jab tōmak, bwe meram in gospel in aiboojoj an Kūraiļ, eo wāween Anij, en rome er.
- [5] Bwe kōm jab make kwaļok kōm, a Kūraiļ Jijeļ e Irooj, im kōm ro korijerami kōn Jijeļ.
- [6] Bwe Anij, eo E ar ba, Jān marok en romaak meram, E ar romaak ilo būruem, bwe En letok meram in jeļā aiboojoj an Anij ilo mejan Jijeļ Kūraiļ.
- [7] A men in aorōk in ippem ej ilo jāpe bwidej ko, bwe maroņ eo e kanooj ļap en jān Anij, im jab jān kōm;
- [8] Ilo ial ko otemjej kōmij obrak, a jab jobōj; kōmij pok, a e jaņin jako kōjatdikdik;
- [9] Reļ matōrtōre kōm, a kōm jab make iaam; reļ jolaļļok kōm, a kōm jab jako;
- [10] □Iien otemjej ej pād ilo ānbwinnem mej an Jijeļ, bwe barāinwōt mour an Jijeļ en waļok ilo ānbwinnem.
- [11] Bwe iien otemjej kōmeo kōmij mour reļ ketak kōm ñan mej kōn Jijeļ, bwe barāinwōt mour an Jijeļ en waļok ilo kanniōkim dien mej.
- [12] Āindein mej ej jerbale ilo kōm, a mour ilo kom.
- [13] A ke ej ippem jetōb eo in tōmak āinwōt men eo eņōj jeje, I ar tōmak, innām I ar kōnono; kōm barāinwōt tōmak, innām barāinwōt kōmij kōnono;
- [14] Ke kōm jeļā bwe Eo e ar kejerkakpeje Irooj Jijeļ, E naaj barāinwōt kejerkakpeje kōm ippān Jijeļ, im kwaļok kōm ippemi.
- [15] Bwe men otemjej ñan kom, bwe jouj eo, eņōj kaļapļok e kōn ro relōņ, en koorļok kaņņoolol ko ñan aiboojoj an Anij.
- [16] Kōn men in kōm jab ebbeer; a meņe ānbwinnem e ļotļok, ijoke kōkāāl am raan otemjej.
- [17] Bwe am eņtaan eo e mōrā im iumeļok, eļap otem ļap an jerbale ñan kōm aiboojoj e jemlōm eddo im indeeo;
- [18] Ke kōm jab kallimjek men ko jej loi, a men ko je jab loi: bwe men ko jej loi re jedkaju, a men ko je jab loi reļ indeeo.

JEPTA 5

- [2Ko 5.1] Bwe kōm jeļā eļāñņe eņōj jeļate am iņōn kōppād i laļ, ewor iņwem jān Anij, mweo pā ko raar jab kōmņane, im indeeo ilo laņ.
- [2] Bwe eņool ilo men in kōmij ñōr, im kanooj kōņaan kōņak mweo iņwem jān laņ:
- [3] Eļāñņe kōn ewor am nuknuk ko re jāmin lo kōm im keelwaan.
- [4] Aet, bwe ke kōmij pād ilo iņōn kōppād in, kōmij ñōr im bolikim: ijoke kōm jab kōņaan utūk men in, a kanuknuk kōm ņa ioon, bwe men in mej eo en jo ilo mour.
- [5] A Eo e ar jerbale kōm ñan men in e Anij, eo E ar letok ñan kōm Jetōb eo men in mōkajkaj.
- [7] Innām kōm peran iien otemjej im jeļā bwe ke kōm jokwe ilo ānbwinnem, kōm jako jān Irooj:
- [7] (Bwe jej etetal kōn tōmak, jab kōn loe);

- [8] Kōm peran, ij ba, im kōṇaanḷok bwe kōmin jako jān ānbwinnem, im jokwe ippān Irooj.
- [9] Kōn men in barāinwōt kōm kajjioñ bwe eḷaññe kōm jokwe ilo ānbwinnem ak jako jān e, kōm kabuñbūruen.
- [10] □Bwe kōj otemjej je naaj waḷok imaan kein jijet in ekajet an Kūrai; bwe jabdewōt iad en bōk men ko kōmanṃAn ilo ānbwinnen, ekkar ñan kōmman eo an eḷaññe emman ak enana.
- [11] Innām kōm am jeḷā mijak Irooj, kōmij kareel armej, a kōm alikkar ñan Anij; im ij kōtmāne bwe barāinwōt kōm alikkar ilo ami bōklōkōt.
- [12] Kōm jab bar kwaḷok kadkadim ñan kom, a kōmij lewōj ñan kom kein kōmmejāje kōn kōm, bwe en wor ami naan in uwaak ro rej kōmmejāje ilo mejeir, im jab ilo būrueir.
- [13] Bwe eḷaññe kōm wūdeakeak, e ñan Anij; ak eḷaññe kōm jeḷāḷokjeṇ, e ñan kom.
- [14] Bwe yokwe an Kūrai e reelel ilo būruem; bwe āindein am ḷōmṃak, Juon e ar mej kōn otemjej, innām ro otemjej raar mej;
- [15] Im E ar mej kōn otemjej bwe ro rej mour ren jab bar mour ñan er make, a ñan Eo e ar mej im jerkakpeje kōn er.
- [16] Kōn men in jān kiiō kōm jab jeḷā jabdewōt armej ekkar ñan kanniōk; meñe kōm ar jeḷā Kūrai ekkar ñan kanniōk, a jān kiiō e jāmin āindein am jeḷā kajjien.
- [17] Innām eḷaññe jabdewōt armej ej pād ilo Kūrai e men in kōmanṃan ekāāl: men ko mokta re ḷotḷok; lo rej erom kāāl.
- [18] A men otemjej rej jān Anij, eo E ar kalaajrak kōj ñan E kōn Kūrai, im E ar letok ñan kōm jermal in kalaajrak;
- [19] Eñin bwe Anij e ar pād ilo Kūrai im Ej kalaajrak laḷ ñan E make, im jab watōk aer jerowiwī ñan er, im E ar likūt ṇa ippem naan in kalaajrak.
- [20] Innām kōm ri keeañ kōn Kūrai, āinwōt eḷaññe Anij ej akweḷap ilo kōm: kōm akweḷap ñan kom kōn Kūrai, koṃwin reel ñan Anij.
- [21] Eo e ar jab jeḷā jerowiwī, E ar kōmman E jerowiwī kōn kōj, bwe jen erom wānōk in Anij ilo E.

JEPTA 6

- [2Ko 6.1] Kōm jermal ippān im barāinwōt akweḷap ñan kom bwe en jab jettokjan ami bōk jouj an Anij,
- [2] (Bwe Ej ba, Ilo iien ekkar I ar eḷoñ eok, im ilo raan in ḷomḷor I ar jipañ eok; lo, kiiō iien emman; lo, kiiō raan in ḷomḷor):
- [3] Ke kōm jab kōmman men in buñ ilo jabdewōt, bwe en ejjeḷok ṇotaan jermal eo am;
- [4] A ilo men otemjej kōm kwaḷok kadkadim āinwōt ri jermal an Anij, ilo kijenmej eḷap, ilo eñtaan ko, ilo aikuj ko, ilo jorrāñ ko,
- [5] Ilo dibitbit ko, ilo prisōn ko, ilo jourur ko, ilo jermal ko, ilo mmej ko, ilo jitḷok ko;
- [6] Ilo erreō, ilo jeḷā, ilo meanwōd, ilo jouj, ilo Jetōb Kwōjarjar, ilo yokwe e jab riab,

- [7] Ilo naan in mool, ilo kajoor an Anij; kōn kein tariṇae in wānōk i anbwijmaroñ im anmiñ,
- [8] Kōn aiboojoj im buijinarmej, kōn buñbuñ enana im buñbuñ emman; ãinwōt ri mon, im kōmij mool;
- [9] ãinwōt ruwamāejet im kōm ruwanene; ãinwōt dien mej, im lo, kōm mour; ãinwōt je, im jab jeeklōk;
- [10] □ ãinwōt būromōj, a kōm lañlōñ iien otemjej; ãinwōt jeraṁōl, a kōm maṁweien elōñ; ãinwōt ejjelōk ippem, im men ko otemjej ippem.
- [11] Loñim e waḷañi ñan kom, ro ri Korint, būruem eḷaplōk.
- [12] Kom jab obrak ilo kōm, a kom obrak ilo būruemi.
- [13] Kiiō bwe in ṇaoneami ilo wāween wōt (ij kōnono ãinwōt ñan ro nejiō) en barãinwōt ḷaplōk būruemi.
- [14] Ren jab kadebijik kom ilo jakkar ippān ro re jab tōmak: bwe yokwe ot ippān wānōk im jab wānōk? ak kōmṁao ot an meram ippān marok?
- [15] Ak ewor ke an Kūraj bōk ñan būruen Bilial? ak ṁōttan ot an ri tōmak ippān ri jab tōmak?
- [16] Ak ta eo ãinwōt juon ippān tempel an Anij im ekjab ko? bwe kōj tempel an Anij emour; ãinwōt Anij e ar ba, I naaj jokwe ilo er, im etetal ilo er, im I naaj aer Anij, im re naaj ro doō.
- [17] Kōn men iṇ koṁwin diwōjtok jān ioḷapeir, im kamakeḷok iaami, Irooj ej ba, im jab uññūr jabdewōt men eo e jab erre; im I naaj bōk kom,
- [18] Im I naaj Jememi, im kom naaj ro nejiō maan im kōrã, Irooj Eutiejtata ej ba.

JEPTA 7

- [2Ko 7.1] Innām ro jitōnbōro, ke kallimur kein ipped, jān make karreoik kōj jān ettoon otemjej in kanniōk kab ad, im koweppan kwōjarjar ilo mijak Anij.
- [2] Koṁwin kapelḷok būruemi ñan kōm; ejjelōk en kōm ar kabōd e, ejjelōk en kōm ar kananaik e, ejjelōk en kōm ar ṁoṇ e.
- [3] I jab ba bwe in liaaklōk kom: bwe E ar ba ṁokta, bwe komij pād ilo būruem in jimor mej ak jimor mour.
- [4] Eḷap aō peran in kōnono ñan kom, eḷap aō kōmmejāje kōn kom: I obrak kōn aenōṁman, e kanooj orḷok lañlōñ ippa ilo am eñtaan otemjej.
- [5] Bwe ke kōm ar itok ñan Masedonia, kanniōkim e ar jab lo kakkije, a kōm ar eñtaan ijo ko otemjej; ãlikim tariṇae ko, ilowam mijak ko.
- [6] Ijokwe Anij, eo Ej kaenōṁmane ro rej ettã, E ar kaenōṁmane kōm kōn an itok Taitōs;
- [7] Im jab kōn an itok wōt, a kōn aenōṁman eo ar kaenōṁmane kake ilo kom, ke e ar kōnnaanōk kōm kōn ami oñkake, kōn ami jañ, kōn ami kijejeto kōn eō; ãin eḷapḷok aō lañlōñ.
- [8] Bwe meñe I ar kabūromōj kom kōn lōta eo aō, I jab ukeḷok kiiō, meñe I ar ukeḷok; bwe ij kile bwe lōta eo e ar kabūromōj kom, a ilo iien eo e kadu wōt.

- [9] Kiiō ij mōñōñō, jab bwe ar kabūromōj kom, a bwe ar kabūromōj kom ñan ukeļok: bwe ar kabūromōj kom ilo men eo ekkar ñan Anij, bwe koṃwin jab bōk jabdewōt jorrāān jān kōm.
- [10] □Bwe būromōj ekkar ñan Anij ej jerbale ukeļok ñan mour, eo ejjeļok bar ukeļok jān e; a būromōj in laļ ej jerbale mej.
- [11] Bwe lo, men in, ke ar kabūromōj kom ekkar ñan Anij, ie āin niknik e ar jerbale ilo kom, ak kowānōk kom, ak illu, ak mijak, ak oñkake, ak kijejeto, ak iden-ōne! Ilo men otemjej kom ar kaṃool bwe ejjeļok ṇotami ilo men in.
- [12] Innām meñe I ar jeje ñan kom, eñin e jab kōn eo e ar kōmṃan nana, im jab kōn eo e ar jorrāān, a kōn kaalikkar ñan kom ami kanooj lale kōm iṃaan mejan Anij.
- [13] Kōn men in eṃōj kaenōmṃane kōm: im ilo am aenōmṃan ar koorļok am lañlōñ kōn lañlōñ an Taitōs, bwe e ar aemōļoļo kōm kom otemjej.
- [14] Bwe eļaññe I ar kōmmejāje jabdewōt ñan e kōn kom, I ar jab jook kake; a āinwōt kōm ar kōnono men otemjej ñan kom ilo ṃool, āindein kōmmejāje eo am ñan Taitōs, barāinwōt ar loe eṃool.
- [15] Im būruen eļapļok ñan kom, ke ej keememej am otemjej kipiliie, ekōjkan kōn mijak im wūdiddid kom ar bōk e.
- [16] Ij lañlōñ bwe ilo men otemjej ij peran kake kom.

JEPTA 8

- [2Ko 8.1] Bar juon kōm kōjjeļaik kom, ro jatiōm, kōn jouj an Anij eo eṃōj leļok ñan eklejia ko i Masedonia;
- [2] Ekōjkan ilo eļap mālejjoñ er kōn eñtaan, aer lañlōñ eļap im kanooj jeraṃōl e ar koorļok aer ṃweiuk in deepļok.
- [3] Bwe āinwōt aer maroñ, ij kōnnaan kōn er, im eļapļok jān aer maroñ, raar kōṃaan im leļok,
- [4] Im kōn elōñ akweļap raar kajjitōk ippem kōn men in jouj in, im kōmṃao ilo jermal ñan ro reṃṃan.
- [5] Im eñin jab āinwōt kōm ar kōtmāne, a raar make leļok er ṃokta ñan Irooj, im ñan kōm kōn ankilaan Anij.
- [6] Āinwōt bwe kōm ar kauwe Taitōs, bwe en kajemļok men in jouj in ilowami, āinwōt eṃōj an jino ṃokta.
- [7] A āinwōt komij ke ilo men otemjej, ilo tōmak, im kōnono, im jeļā, im ilo lolñijñij otemjej, im ilo ami yokwe kōm, lale bwe koṃwin barāinwōt ke ilo men in jouj in.
- [8] I jab ba kōn kaiñi, a kōn lolñijñij an ro jet, bwe in mālejjoñ ṃool in ami yokwe.
- [9] Bwe komij jeļā jouj an ad Irooj Jijej Kūraij, bwe meñe E kein ṃweiie, E ar erom jeraṃōl kōn kom, bwe koṃwin ṃweiie kōn An jeraṃōl.
- [10] □Im I ar kwaļok aō pepe ilo men in: bwe men in men in kakajooror komeo, kom ar jino ṃokta jab in kōmṃan wōt, a pepe in kōmṃan juon iiō emootļok.
- [11] A kiiō koṃwin barāinwōt kaṃōjļok ami kōmṃane, bwe āinwōt e ar ewor pepe in kōṃaan, āindein barāinwōt en wor kaṃōjļok kōn ami maroñ.

- [12] Bwe eļañņe ededeļok ļōmņak, ej kabuñbūru ekkar ñan men ko ippān armej, jab ñan men ko ejjeļok ippān.
- [13] Bwe I jab ba men iņ bwe armej ro jet ren jeraamman, im kom jorrāān:
- [14] A kōn jipjipān doon; iuņwin iien iņ, ami jeraamman en kake aer jeraṁōl, bwe aer jeraamman en barāinwōt kake ami jeraṁōl; bwe en jokoņ wōt juon:
- [15] Āinwōt eṁōj jeje, Eo e ar aini elōñ ejjeļok bween, im eo e ar aini edik ejjeļok an aikuļ.
- [16] A kaṁmoolol Anij, eo E ar likūt ilo būruen Taitōs bwe en kanooj lale kom.
- [17] Bwe eṁool e ar eņroñ am kauwe e; a bwe eļap an lolñijñij, kōn an make kōņaan, e ar iwōj ñan ippemi.
- [18] Im kōm ar jilkinļok ippān ļok juon jatiōm, eo e buñbuñ ilo gospel ippān eklejia otemjej;
- [19] Jab men iņ wōt, a barāinwōt eklejia ko raar kāālōt e bwe en karwaan kōm ilo men in jouj iņ, eo kōm jermal kake, bwe kōmin kaiboojoj Irooj, im kwaļok am kōņaan:
- [20] Ke kōm kōjparok men iņ ñe raab kinaakļok kōm ilo lokot iņ kōmij jerbale:
- [21] Bwe kōm ļōmņak kōn men ko men in nōbar, jab iṁaan mejan Irooj wōt, a barāinwōt iṁaan mejan armej.
- [22] Im kōmij jilkinļok ippaerroļok jatiōm eo elōñ alen am mālejoñ an lolñijñij ilo men ko relōñ, a kiiō eļapļok an lolñijñij, kōn an ļap an lōke kom.
- [23] Eļañņe jabdewōt ej kajjitōk kōn Taitōs, e rājeta im ej jipān eō ñan kom; eļak ro jatiōm, er ri jelōk an eklejia ko, aiboojoj an Kūraij.
- [24] Innām koṁwin kwaļok ñan er kein kaṁool ami yokwe, im am kōmmejāje kōn kom, iṁaan mejan eklejia ko.

JEPTA 9

- [2Ko 9.1] Bwe kōn jermal ñan ro reṁman, ejjeļok unin aō jejewōj ñan kom:
- [2] Bwe I jelā dedeļok an ami ļōmņak, im ij kōmmejāje kōn kōm ñan ro ri Masedonia, bwe jān iiō e jeṁļok e pojak Akeia, im ami kijejeto e ar kōkātōk elōñ iaer.
- [3] A I ar jilkinwōj ro jatiōm, bwe am kōmmejāje kōn kom en jab jatokjān ilo men iņ; bwe, āinwōt I ar ba, koṁwin pojak:
- [4] Eļañņe jab āinwōt ñe ewor ri Masedonia rej iwōj ippa, im lo ami jab pojak, kōm naaj jook (I jab ba kom) ilo lōke iņ.
- [5] Innām I ar ļōmņak eṁman bwe in akweļap ñan ro jatiōm bwe ren iwōj ṁokta ñan kom, im kōmanman ṁokta ami men in yokwe, eo eṁōj ṁuri kake ṁokta, bwe en pojak āinwōt men in yokwe, im jab men in kowadoñ.
- [6] A ij ba men iņ, eo ej jeor im kaļmarok e naaj barāinwōt ṁadṁōd im kaļmarok: im eo ej jeor im deep e naaj ṁadṁōd im jeraamman.
- [7] Jabdewōt armej āinwōt e ar pepe ilo būruen, āindein en leļok; jab kōn kaļmarok, ak ṁakoko: bwe Anij ej yokwe eo e ṁōṁōṁō in leļok.
- [8] Im Anij e maroñ in kōmman bwe jouj otemjej en ke ñan kom; bwe koṁwin jeraamman ilo men ko otemjej, im ōkeke ñan jermal otemjej reṁman:

- [9] Āinwōt emōj jeje, E ar kajepłōklōk, e ar leļok ñan ro rej jeramōl; An wānōk ej pād wōt indeeo.
- [10] □Im Eo ej kake ine ñan ri jeor, im bred ñan mōñā, E naaj kake im koorļok ami ine in jeor im kalōñļok leen ami wānōk:
- [11] Ke ñamweiemi ilo men otemjej ñan deepļok otemjej, eo ej jerbale ilo kōm kaṁmoolol ñan Anij.
- [12] Bwe kōmman jipañ in ej kake aikuj an ro remman, im jab men in wōt, a ej ke barāinwōt ñan elōñ kaṁmoolol Anij;
- [13] Bwe ilo mālejjoñ kom kōn jerbale in, rej kaiboojoj Anij kōn ami kipiliie, im kwaļok gospel an Kūraij, im kōn ami deepļok im leļok ñan er im ñan otemjej;
- [14] Ke er barāinwōt rej jar kōn kom, im jañware kom kōn jouj an Anij ej ilo kom.
- [15] Kaṁmoolol Anij kōn An men in letok eo eļap jān maroñ in ba.

JEPTA 10

- [2Ko 10.1] Kiiō ña Paul ij akweļap ñan kom kōn ineeṁman im jouj an Kūraij, ña eo ke ij iṁaan mejemi I tā ippemi, a ke I jako I peran ñan kom:
- [2] Aet, ij kajjitōk ippemi bwe in jab peran ñe ij pād ippemi, im āinwōt ij ļōmṁak in peran ñan jet, ro rej ļōmṁak kōn kōm āinwōt kōmij etetal ekkar ñan kanniōk.
- [3] Bwe meñe kōm etetal im ilo kanniōk, kōm jab tariṁae ekkar ñan kanniōk,
- [4] (Bwe kein tariṁae ko kōm tariṁae kaki re jab jān kanniōk, a re kajoor ilo Anij ñan jolallōk jikin ko re kajoor);
- [5] Ke kōm jolallōk kōlmanļokjeṁ ko, kab jabdewōt men eo eutie, emōj koutiej e ṁae jeļā an Anij, im kejiṁokwe ļōmṁak ko otemjej ñan pokake Kūraij;
- [6] Im kōm pojak in kwi kake kipiliia otemjej, ñe ami pokake e naaj jejjet.
- [7] Komij kallimjek men ko iṁaan mejemi. Eļaññe jabdewōt armej ej lōke ilo e make bwe e doon Kūraij, en bar kōlmānļokjeṁ men in ippān, bwe āinwōt e doon Kūraij āindein barāinwōt kōm.
- [8] Bwe meñe ij kōmmejāje eļap jidik kōn am maroñ (eo Irooj e ar letok ñan kalōk kom im jab kōn kōkkure kom), I jāmin jook kake:
- [9] Bwe in jab kōmman āinwōt in ka lōļñoñ kom kōn lōta ko.
- [10] □Bwe lōta ko an, re ba, ewor kobhair im re kajoor; a an ānbwinnen pād emōjṁo, im an kōnono jekdoṁ.
- [11] Eo āinwōt, en ļōmṁak men in, bwe āinwōt kōmij ilo naan kōn lōta ko ke kōm jako, kōmij āindein ilo kōmman ñe kōm pād ippemi.
- [12] Bwe kōm jab peran in likūt kōm ippaer, ak keidi kōm ñan ro jet rej make nōbar er: a er, ke rej joñe er ippān doon im keidi er ñan doon, re jab mālōtlōt.
- [13] A kōm jāmin kōmmejāje eļap jān am joñak, a ekkar ñan joñak in kien eo Anij e ar ṁajoñan ñan kōm, joñak eo ļok ñan kom.
- [14] Bwe kōm jab kanooj kaitokļok kōm, āinwōt eļaññe kōm jab tōpar wōj kom; bwe kōm ar wanṁaanwōj ñan kom ilo kwaļok gospel an Kūraij:

- [15] Im kōm jab kōmmejāje im eļap jān joņan, kōn jermal ko an ro jet; a kōn kōtmāne bwe ñe ej eddekļok ami tōmak, kōm naaj rūttoļok ippemi ekkar ñan kiem ñan orļok eļapļok,
- [16] Bwe kōmin kwaļok gospel ñan ijoko rettoļok jān kom, bwe kōmin jab kōmmejāje kōn men ko ilo kuņaan bar juon repojak ñan peim.
- [17] A eo ej kōmmejāje, en kōmmejāje ilo Irooj.
- [18] Bwe e jab lejokmen ļeo ej make kwaļok kadkadin, a ļeo Irooj ej kwaļok kadkadin.

JEPTA 11

- [2Ko 11.1] I kōņaan bwe koņwin meanwōd ñan eō, ilo aō bwebwe edik: aet, eņool koņwin meanwōd ñan eō.
- [2] Bwe ij kaņo kōn kom ilo e kaņo ekkar ñan Anij: bwe I ar karōk kom ñan juon pāleemi, bwe in leļok kom āinwōt bōjin erreō ñan Kūraij.
- [3] A I mijak, ñe ab kōn jabdewōt, āinwōt jedpānit eo e ar kapo Iv kōn an etao, āindein ļōmņak ko ami ren ettoonļok jān kwōjarjar im erreō eo ilo Kūraij.
- [4] Bwe eņool eļañņe eo ej itok ej kwaļok bar juon Jijej, eo kōm ar jab kwaļok e, ak eļañņe kom bōk bar juon jetōb, eo kom ar jab bōk e, ak bar juon gospel, eo kom ar jab eņoņ e, eņņan koņwin meanwōd ñan e.
- [5] Bwe ij ļōmņak I jab ettā kōn jabdewōt jān ri jelōk reutiejtata.
- [6] A meņe I apeltak ilo kōnono, I jab āindein ilo jeļā; aet, ilo men otemjej kōm ar kaalikkar e ippān armej otemjej ñan kom.
- [7] Ak I ar bōd ke ilo aō make kōttāik eō bwe koņwin utiej, bwe I ar kwaļok gospel an Anij ñan kom im ejjeļok oņān?
- [8] I ar kowadoņe eklejia ko jet, im bōk oņāō jān er bwe in jipaņ kom;
- [9] Im ke I ar pād ippemi im aikuļ, ejjeļok en e ar kōmņan kapjera; bwe men ko I ar aikuļ, jemjein jemjaten raar itok jān Masedonia raar kake; im ilo men otemjej I ar kōjparok bwe in jab kajeraņōl kom, im āindein I naaj kōjparok eō.
- [10] □Āinwōt mool an Kūraij ilo ña, ejjeļok armej e naaj bōbrae eō jān kōmmejāje iņ ilo āne ko Akeia.
- [11] Bwe bōta? bwe I jab yokwe kom ke? Anij e jeļā.
- [12] A men eo ij kōmņane, I naaj kōmņane bwe in bōk kein jarōk jān ro re kōņaan lo arin; bwe ilo men eo rej kōmmejāje kake, ren waļok āinwōt kōm.
- [13] Bwe ro rej āinwōt er, ri jelōk riab, ri jermal etao, im rej make kōmņan er ri jelōkan Kūraij.
- [14] Im ejjeļok bwilōñ, bwe Setan ej make kōmņane enjel in meram.
- [15] Innām e jab ļap eļañņe ro an ri jermal rej barāinwōt make kōmņan er āinwōt ri jerbale wānōk; jemlokaer e naaj ekkar ñan jermal ko aer.
- [16] Ij bar ba, Ejjeļok armej en ļōmņak ña ij bwebwe, a eļañņe e jab āindein koņwin bōk eō āinwōt ñe ij bwebwe, bwe in barāinwōt kōmmejāje jidik.
- [17] Men eo ij kōnono, I jab kōnono ekkar ñan Irooj, a āinwōt ilo bwebwe, ilo lōke in kōmmejāje iņ.
- [18] Bwe elōñ rej kōmmejāje ekkar ñan kanniōk, I naaj barāinwōt kōmmejāje.

- [19] Bwe komij mōḡōḡō im meanwōd ñan ri bwebwe, ke kom make mālōtlōt.
- [20] Bwe kom meanwōd ñan juon armej eḷaññe ej kamakokoik kom, eḷaññe ej kōñta kom, eḷaññe ej jibwe kom, eḷaññe ej make koutiej e, eḷaññe ej jekanunok kom ilo mejemi.
- [21] Ij kōnono nae eō āinwōt eḷaññe kōm kar mōjḡo. A ilo jabdewōt juon ej peran, (ij kōnono ilo bwebwe), ña I barāinwōt peran.
- [22] Er ri Hibru ke? barāinwōt ña. Er ri Israel ke? barāinwōt ña. Er ineen Ebream ke? barāinwōt ña.
- [23] Er ri jermal an Kūraij ke? (ij kōnono āinwōt ḷokjenaō) ña utiejḷok; ilo jermal ko eḷapḷok, ilo prisōn ko elōñḷok alen, ilo deñḷok ellā jān joñak, ilo mej ko mōkaj.
- [24] I ar bōk mōttan juon bwe en eñoul dibitbit ḷalem alen jān ri Ju ro.
- [25] Jilu alen ar deñḷok eō kōn aḷaḷ, juon iien ar kade eō, jilu alen erup wa eo I ar pād ioon, juon boñ im raan I ar pād ilo lojet;
- [26] Ilo etal ko mōkaj, ilo uwōta ko kōn reba ko, ilo uwōta ko kōn ri kowadoñ, ilo uwōta ko kōn armej ro ri āneō, ilo uwōta ko jān ro ri pegan, ilo uwōta ko ilo jikin kwelok, ilo uwōta ko ilo āne jemaden, ilo uwōta ko ilo lojet, ilo uwōta ko ippān ro jemjein jemjaten riab;
- [27] Ilo jermal in eñtaan, ilo ekil ko mōkaj, ilo kwōle im maro, ilo jitḷok ko mōkaj, ilo piḡ im keelwaan.
- [28] A ewor jān bar men ko jet re waḷok, men eo ej itok ioō raan otemjej, inepata kōn eklejia otemjej.
- [29] Wōn e mōjḡo, im I jab mōjḡo? wōn ḷatipñōl e, im e jab bwil būruō?
- [30] Eḷaññe emman in kōmmejāje, I naaj kōmmejāje kōn men ko ilo aō mōjḡo.
- [31] Anij, aet Jeman Irooj Jijej, Eo e mōḡōḡō indeeo, E jeḷā bwe I jab riab.
- [32] Ilo Damaskōs, irooj eo ettā jān Aritas kiñ, e ar baar jikinkwelok an ri Damaskōs bwe en jibwe eō:
- [33] Im kōn kapjer, ilo kilōk ar door eō laḷḷok ilo wōrwōr, im I ar ko jān pein.

JEPTA 12

- [2Ko 12.1] Emman bwe in kōmmejāje, meñe e jab men in kakajooror, a I naaj itok ñan visiōn ko im revelesōn ko an Irooj.
- [2] I jeḷā juon armej ilo Kūraij, joñoul im emān iiō remootḷok (eḷaññe ilo ānbwinnen, I jab jeḷā; ak eḷaññe ālikin ānbwinnen, I jab jeḷā; Anij e jeḷā), ar kotaklōñḷok ḷeḷñ ñan lañ kein ka jilu.
- [3] Im I jeḷā armej iḡ (eḷaññe ilo ānbwinnen, ak e jepel jān ānbwinnen, I jaje; Anij e jeḷā),
- [4] Ekōjkan kotaklōñḷok e ñan lowaan Paredais, im ej roñ naan ko je jab maroñ in kōnono, ko e jab mālim bwe armej en ba.
- [5] Kōn ḷeḷñ I naaj kōmmejāje: a kōn ña I jāmin kōmmejāje, eḷaññe e jab kōn aō mōjḡo ko.

- [6] Bwe meñe I kõṇaan kõmmejãje, I jãmin ri bwebwe; bwe I naaj kõnono ṁool: a kiiõ eṁõj, bwe jabdewõt armej en jab lõmṇak kõn ña I ļap jãn men eo ej lo eõ, ak roñ jãn eõ.
- [7] Im bwe in jab juwaļõñļõñ kõn an kanooj ļap revelesõn ñan eõ, ar letok ñan eõ juon kãlõklõk ilo kanniõkiõ, juon ri jelõkan Setan bwe en ubrare eõ, bwe in jab juwaļõñļõñ.
- [8] I ar akweļap ñan Irooj kõn men in alen jilu, bwe en jako jãn eõ.
- [9] Im eṁõj An ba ñan eõ, Aõ jouj e bwe ñan eok, bwe Aõ kajoor e weppãñļok ilo ṁõjṇo. Innãm I naaj kanooj ṁõṇõṇõ in kõmmejãje kõn ṁõjṇo ko aõ, bwe kajoor an Anij en pãd ioõ.
- [10] □Innãm ebuñbũruõ ilo ṁõjṇo ko, ilo jorrãan ko, ilo aikuļ ko, ilo matõrtõr ko, ilo eñtaan ko kõn Kũraiļ: bwe ñe I ṁõjṇo, innãm I kajoor.
- [11] Ña ij erom ri bwebwe, kom ar kamakokoik eõ, bwe eṁṁan komwin kar kwaļok kadkadiõ: bwe I jab likjab, kõn jabdewõt, jãn ri jelõk reutiejtata, meñe ij jekdoṇ.
- [12] Eṁool kakõļle ko an ri jelõk ar kõmṁan ilo bwiljimi ilo kijenmej otemjej, kõn kakõļle ko im men in bwilõñ ko, im jermal ko re kajoor.
- [13] Bwe ta eo kom ar likjab jãn eklejia ko jet kake, eļaññe jab bwe I ar jab men in eddo ñan kom? Komwin joļok nana in aõ.
- [14] Lo, alen in kein ka jilu I pojak in iwõj ñan kom; im I jãmin eddo ñan kom: bwe I jab pukot ṁweiiemi, a kom: bwe e jab kuṇaan ajri ojõk jemeir im jineir, a kuṇaan jemeir im jineir ojõk ro nejir.
- [15] Im I naaj ṁõṇõṇõ in deepļok im niknik kake kõn ami. Eļaññe eļapļok aõ yokwe kom, edikļok ami yokwe eõ ke?
- [16] A en ãindein, Ña I ar jab kajeraṁõl kom; ijoke, ke I bãjik, I ar jibwe kom kõn mãlõtlõt.
- [17] I ar make kejeraaṁṁan eõ ippemi ke kõn jabdewõt iaan ro I ar jilkinwõj ñan ippemi?
- [18] I ar kauwe Taitõs im I ar jilkinwõj ippãn wõj jatim eo. Taitõs e ar make kejeraaṁṁan e ippemi ke? kõmro ar jab etetal ilo juon wõt Jetõb ke? e jab juon wõt jenkwaneem ke?
- [19] Etto komij lõmṇak bwe e ñan kom kõmij uwaak kõn kõm make. Kõm kõnono iṁaan mejan Anij ilo Kũraiļ. A men otemjej, kom jitõnbõro, kõn kalõk kom.
- [20] Bwe I mijak, eļaññe, ñe ij iwõj, I ab lo kom jab ãinwõt I kõṇaan ilo jabdewõt, im I ab waļok ñan kom ãinwõt kom jab kõṇaan: ñe ab jet bõrojepel, juunṁaade, illu ko, akwãal ko, ruruwe ko, unojidikdik ko, airuwaro ko;
- [21] Im ñe aõ Anij e ab kõttãik eõ iṁaan mejemi ñe ij bar iwõj, im I ab jañõt elõñ ro raar jerõwiwi ṁokta, im re jañin ukeļok ippaer kõn ettoon im lõñ im nana ko raar kõṁanṁAn.

JETPA 13

- [2Ko 13.1] Alen in kein ka jilu ij iwõj ñan kom. Kõn lõñin ruo ak jilu ri kõnnaan naaj kapen naan otemjej.

- [2] I ar ba mokta, im ij ba kiiō, āinwōt ke I ar pād ippemi alen kein ka ruo, barāinwōt kiiō ke I jako, ñan ro raar jerōwiwi mokta, im ñan ro otemjej jet, bwe, eļañne ij bar iwōj, I jāmin tūriamo kake;
- [3] Bwe komij pukot kaṃool kōn an Kūraij kōnono ilo ña, Eo e jab ṃōjṃo ñan kom, a E kajoor ilo kom.
- [4] Bwe ar debwāāl E ilo ṃōjṃo, a Ej mour kōn kajoor an Anij. Bwe kōm barāinwōt ṃōjṃo ilo E, a kōm naaj mour ippān kōn kajoor an Anij im ñan kom.
- [5] Koṃwin make mālejjoñ kom eļañne kom pād ilo tōmak eo; koṃwin make kaṃool kom. Ak kom jab make jeļā ke, bwe Jijej Kūraij ej pād ilo kom? eļañne kom jab dien jako.
- [6] A ij kōtmāne bwe kom naaj jeļā bwe kōm jab dien jako.
- [7] A kōm jar ñan Anij bwe koṃwin jab kōṃanṃan nana; jab bwe en waļok am ṃool, a bwe koṃwin kōṃṃan eṃṃan, meñe kōm āinwōt dien jako.
- [8] Bwe ejjeļok aṃ maroñ in juṃae ṃool, a kōn ṃool wōt.
- [9] Bwe kōm lañlōñ ñe kōm ṃōjṃo im kom kajoor: im kōm naaj jar kōn men in, bwe koṃwin weppānļok.
- [10] □Innām ij jeje men kein ke I jako, bwe, ñe ij pād ippemi, en jab pen aō in naan, ekkar ñan kajoor eo Irooj e ar letok ñan eō kōn kalōk, im jab kōn jolaļļok.
- [11] Āliktata, ro jatiō, koṃwin lañlōñ, koṃwin aenōṃṃan, koṃwin weppān, en būruemi wōt juon, koṃwin mour ilo aenōṃṃan: im Anij in yokwe im aenōṃṃan E naaj pād ippemi.
- [12] Koṃwin yokuokwe doon kōn mejenma e kwōjarjar.
- [13] Ro reṃṃan otemjej rej yokyokwe kom.
- [14] Jouj an ad Irooj Jijej Kūraij, im yokwe an Anij, im kōṃṃao an Jetōb Kwōjarjar, en pād ippemi otemjej.